

臨

榆

縣

志

二十

臨榆縣志卷之二十

事實編三

鄉型中 行誼

明

張雲鵬本衛人父病後不假寐湯藥親嘗父歿喪敦古禮廬墓三年祀忠孝祠
趙文舉本衛人幼極孝母病疽痛不可忍醫皆云不治祝天願代日自所居三
步一拜至神廟焚香祈其母壽母獲痊家素窘居常奉母卽富者不能過云
祀忠孝祠

蕭韶鳳本衛人十九歲父病疊迎醫視之曰得樟柳木根可愈城中求之不得
或告以產於海陽時石河水暴漲不可渡韶直前往覓家人止之泣曰父病
篤阻水而止於心忍乎竟涉至中流溺死三日浮屍海上君子重其孝而哀
其愚祀忠孝

張懋勳都督世忠子也痛父沒於王事每語及輒流涕事孀母三十餘年孝養

備至母卒哀毀骨立廬於墓側躬負土成墳暑雨祈寒不輟終制後鄉人相率迎歸當道屢旌其門祀忠孝

傅夢良增生性純篤與兄炤事母孝母歿哀毀骨立既葬皆欲廬墓良曰兄弟共廬墓則妻子安依不如兄在家養眷屬弟代兄行炤雖允之猶哭奠於靈牀前日三次終喪不懈良廬墓側穴居負土築墳晨昏哭泣秋夏霖雨累日夜穴水盈尺不爲動服闋還家日行五步一拜哭盡哀兄亦偕弟逆行拜哭紳衿親友郊迎上官旌表其門祀忠孝

穆思文衛庠生事繼母孝曲盡子騫之節有二弟俱繼母出財產均分後二弟寒窘爲弟之子給產婚娶督學汪應元題請建坊曰孝義祀忠孝祠

劉復言字顧齋鄉賢復禮之弟幼操鉛槧業下帷攻苦因兄官巴西清風兩袖命妻作鍼黹易貲奉母事兄如父不以兄貴而驕人亦不僭其服飾兄老疾侍藥不離憾不身代兄歿讓家事與姪雖飢寒不肯干人待人和而能忍咸

稱爲誠厚長者

節王兵憲胤祥劉顧齋傳

劉允元字虞卿延齡次子邑庠生通明經史博覽羣籍工詞翰精文章善草書賦性忠誠事親至孝不慕名利居城西劉家莊

節行述

劉愼邑庠生知府克孔父也處鄉純良教子有方親屬之孤而無依者皆周恤之如同宗文燦等俱教養之後闔學公舉鄉飲輔賓辭不受年八十一無疾

卒

節行述

劉鼎鉉字玉調延齡長孫邑庠生事繼母極孝讓產於弟管關通判周廷潤舉鄉飲榜其門曰師世範俗固辭不受遂隱於山中年九十一歲卒

高廷科善體親心曲盡孝道至老彌篤鄉人咸重之題其額曰孝無閒言

劉良瑋邑庠生天性純篤事父母曲盡其孝父沒哀毀死而復甦親族勸慰始強進水漿然終身無笑容鄉里咸欽重之

王士倜衛庠生敦樸謹慎天性孝友父從政知山東萊陽縣以持正忤當事被誣繫獄倜偕弟偉搗登聞鼓劾頸力救卒白父冤鄉人稱之上官屢旌其門祀忠孝祠

穆大任衛庠生至性純篤父早逝事母以孝聞母歿躬廬墓側負土成冢值兵變鄉民居村落者皆入城避亂大任獨守墓不忍去後終三年之制士庶相率迎歸入忠孝祠

俱舊志

程繼賢字敬庵贈卿矩子由庠貢考授武英殿內閣中書歷工部都水清吏司員外郎陞尙寶司卿封朝議大夫從四品服俸事親孝父壽百歲具奏建坊事兄長曲盡弟道有舊好戶曹郎鄧承簡粵西人也以事羈京師八年賢每濟之久而不厭後鄧病歿爲具棺殮歸其喪有友爲錢法督理以三千金密送賢寓賢正色拒之又曲爲之地陳利害以沮之未幾事果敗衆服其識明操潔不負所知本衛有均徭銀每歲僉派催頭大爲民擾賢爲陳諸當事除其弊年踰七旬見後生亦恂恂自下鄉人稱爲長者甲申闖賊陷都城被執不屈捶幾死脫走津門仍遇賊被害清順治十八年祀鄉賢祠

舊志參府志

清

李集鳳字翺升忠義友松次子生有異質年十五餽於庠有聲由順治十二年

拔貢授洛陽縣丞卒於官年六十有六性方嚴不慕權勢其初應京兆試也寓中貴宅明懷宗幸別殿供張甚設中貴邀往縱觀歸輒自悔責曰若輩其可與爲緣乎遂絕不與通洎爲丞丞故卑位毋得專治民事守若令有以事委者率以賄成集鳳力矯之以廉明稱於學無所不窺凡濂洛關閩之書悉究其義尤善春秋彙先儒註解討辨詳核歷三十年凡四易彙成書六十五卷名春秋集解辨疑檢討汪楫出守河南府雅重其書新城尙書王士正稱以研精三傳下吏之有經學者洛陽人請從祀周公廟康熙五十三年從祀

鄉賢

參畿輔志及王漁洋蠶尾記

崔聯芳字子宗順治二年丙戌登賢書時父久客不歸至是聞凶問不知死所日夜號泣不欲生跋涉歷四省尋之神示以夢於河南確山縣得之負骨歸葬例選爲令以母老不就生平嗜學手不釋卷至老彌篤性方嚴少所假借苟非其人未嘗與語殆古之所稱狷者歟康熙五十三年崇祀鄉賢

舊志

清戴肇名崔孝廉尋親記崔君子宗者榆關雅閭蟾窟清流品度端凝市

有乘羊之譽門風雍穆欄無鬪鳴之嬉賦鸚鵡於垂髫文斤斲玉對楊梅
於佩觿筆沼含珠執耳騷壇甫著荷衣而浣藻置身月府旋離席帽以題
牋屬在華齡早嫻大雅是緣鯉庭問禮家學本自淵源以故陸坐懷甘天
性亦形肫摯也然而生來利器不逢盤錯以奚彰養就神砂獨遇汰淘而
益顯挺後雕之蒼蠶獨貫繁霜耐晚節之寒香偏支積霰是以國非板蕩
古人誰見孤忠惟其家實危疑爾日始成至孝太翁則先安里食繼作旅
人鞭影迎風聽荒村之夜柝雞聲唱月促茅店之晨裝遵鄂渚以過征鄉
程漸遠循衡山而至止客夢長賒約斷刀環空倚樓頭而計日函廻雁岫
頻從天末以瞻雲時則慈母啼帷忽訝天蛇之信孝廉寢塊頓深風木之
悲念華表何歸敢辭跋涉遂呼號以往不憚嶽崎萬里蓬飄徧灑秦庭之
淚一身萍泊難招楚國之魂爾乃刺血呼天通精誠於奎宿尋聲搶地昭
奇示於文昌觸彭蠡之洪濤鷁舟一葉摩太行之峭壁鳥道千盤葛屨黏
埃初問臨湘之驛麻衣皎雪親經於菟之鄉旣而轉徙梁城重過確邑痛

迴腸之九折淚漬頹頹泛前路之雙歧炎延渴吻無聊乞水宛類吹簫是處爲山遽聞埋玉適符先兆彌徵司祿之靈試驗遺骸不改滕公之室於是望窮嚙指裹將丹血之衫伏草陳哀薦以碧雞之供返故人之尺素介不傷廉慰人子之寸衷事能竭力曰歸舊里謹卜牛眠爰窆豐阡聿來鶴弔斯先雄沈水於今直可齊茵而古初伏棺較昔無妨並駕也矧復蓼莪廢誦莫扶東海之鳩諼草忘憂倍篤北堂之綵尙何心於仕進左以琴而右以書唯決意於承歡出必告而返必而優游娛世洵爲錫類之完人進退中權不忝肯堂之令子嗚呼江河漸下疇能儷此風規名教斯存自合崇諸黌校似君至範已可垂百世以流芳顧我閒曹勿克籲九重而賜綽聊題簡首姑樹風聲景慕匪遙好續補白華之什典型宛在請共看黃絹之詞

清郭如柏題尋親記詩失怙長號問彼天杜鵑何處叫荒煙敢拌一死尋親去遠涉三湘覓骨還山水有緣知旅櫬精魂返國妥黃泉感深風木終

高隱不愧人稱眞孝廉

程大猷明經歷繼伊子廩貢性至孝父歿廬墓三年服闋選華亭縣教諭任事月餘見諸生志氣輕浮文章綺靡以沈重端莊矯之大有進功遜聰敏者住齋厚其廩餼月課超特者常獎之外破格從豐一時士氣奮興文風丕煥以母老歸養母歿如父歿時

家乘

程觀光字用賓明尙寶繼賢子增生友愛性成兄宦山東弟遊幕江左光理家政諸姪無閒言順治初關塞空虛募民開墾光應募民之召招集戶口充實邊陲論功准作貢生以同通選用旋授湖廣衡州府同知任事後興利除害鋤莠安良一切陋規借端裁撤衡俗頑疲已極繩以峻法民畏其威教養兼施民又感其慈惠髦年致仕兄觀頤由淄川令歸里弟觀國課孫曾於家籩豆一堂融融穆穆年俱九秩時人望若三仙云

舊志

徐進禮字天一賦性醇樸少貧以勤儉力自振興與人交忠信和義尤篤友愛兩弟早世遺孤穉齡撫翼教訓二十餘年同居無閒言年及七旬未嘗一至

公庭有古君子風

府志

謝不智字若愚府庠生事親誠孝母病湯藥親嘗衣不解帶者兩月病轉劇乃焚香虔禱封股投藥母遂痊康熙三十二年公舉孝行郡守梁世勳旌其門入忠孝祠

吳元臣性至孝母病危篤醫藥罔效乃焚香叩天封股投藥中母飲遂痊康熙四十二年公舉孝行有司旌之入忠孝祠

高士瑱縣學庠生父凌霄卒時士瑱年已六十廬墓三年朝夕哭奠孺慕彌篤母吳氏繼卒廬墓亦如之入忠孝祠

俱舊志

楊時盛字茂林世居石門性狷介無所苟年八十餘由歲貢爲邯鄲縣訓導九十告歸舉鄉飲大賓其鄉試赴都也謁表兄房某房謂若主我交通關節功名可立得時盛惡之不履其門司鐸邯鄲時子度年五十而鰥有宦遊之妾新寡美而多財無子欲嫁之人爲作蹇修度稟時盛時盛怒不食亦不言度請罪事遂寢年九十二康熙四十七年卒

行狀

程廷宣字御綸訓導體乾姪孫康熙三十五年亞元性豪邁不屑屑於功名出逢義句於途與之錢使營業句贏利百倍稱富翁持金報恩拒弗受故人子有鬻產者代贖歸再鬻無售主故人子因得全後揀選知縣力辭晚年築室煙墩學養氣名山勝水遂以是終

家乘

張可興字起之家素封性慷慨由奉天禮部教習知山東高苑縣有鄰縣令某虧項累萬憲臺委往查辦可興至鄰縣某實言其事不隱乞救甚迫可興曰予謂汝飾稟上憲不信且廢公况再委他員何以待之莫如爲汝包補之始能拯汝於危某頓首感泣可興還代某具結遣人回籍將已產變賣一空傾囊貸某償還某始免於難卽告病去越數載可興亦解組歸比至家第清風兩袖而已

家乘

程鵬字萬九增廣生訓導體乾姪孫性好施嘗舍響塘百餘丈作車道舍市房數十間作祭田至於周濟親朋尤無厭倦與巨族劉姓爲姻戚當時稱西關善人程四海南關善人劉二百云

牛天貴程萬茂才傳

郭如柏字新甫康熙甲午舉人性孝友習易工詩制義尙清真於王守谿唐荆川爲近嘗批顏氏家訓教子篇云須知孝從畏慎來又云讀內則嘗疑骨肉之間其禮太煩今讀至不可以簡簡則慈孝不接始豁然其生平學問務實大率類此考取內閣中書未供職卒錢塘王雲廷爲立傳著有慎餘堂時藝

史夢蘭止
園詩話

清李養和郭廓菴先生傳先生諱如柏字新甫號廓菴其先河南汝寧府確山縣人明初從徐武寧王鎮撫山海世襲指揮同知代有令名曾祖通遠公衛庠生明末往來臨淄賑濟飢疫不吝囊橐出金救全鄰舟溺祖仲金由廩貢授良鄉教諭擢山東平陰令陞湖廣安陸府同知恩蔭一子入監所至有善政崇祀鄉賢祠父諱天遴垂髫入泮樹幟文壇號稱耆宿先生少穎異凡所涉目經數十年後舉試之歷歷不爽弱冠連丁內外艱服闋入邑庠旋食廩餼登康熙甲午科賢書十餘歲時穆太孺人見背居喪旣能盡禮府試冠軍屬繼母馮太孺人卒太翁欲以出繼俾就院試先生

力求終制乃止太翁病與季弟侍左右衣不解帶湯藥必親百方祈禱屬
續後哀毀骨立以長兄如松羈京師未歸久而後葬起臥守禮三年不入
內室兩弟先後病殂方在牀褥先生皆手調湯藥時刻護持不忍離去卒
後慟悼親視殯殮長兄客游二十年先生奉嫂益謹每誕節必率子弟拜
堂上姪熙幼親加督課無異己子郭氏族繁或不通往來先生始爲聯屬
閒有爭訟者出一言慰解之無不渙然冰釋族子弟來受業可造者資以
筆墨業醫王君工詩精手談先生素與交其子以女鬻人日受箠楚先生
聞而憐之募貲取贖父子完聚王君逮七旬子不能養先生延至家贍養
半載餘轉薦赴開平得食其業以終餘年一日過駐防旗官某家見幼僮
跪庭前曝烈日中詢知爲蕭海釣先生嫡裔鬻爲僕者先生惻然偕友人
出金贖之給以衣米歲以爲常先生雖處儒素雅不乞假於人姊夫號素
封終身不受絲毫惠妹夫領官帑耗費千餘金迄追帑日先生獨無一錢
之欠復設法周全脫其子孫追比之累舌耕近三十年後進爭來受業戶

外屨滿多成偉器一時有桃李盡在門牆之譽積書數千卷每閒居靜坐焚香淪茗評論古今如置身周秦兩漢間讀書不事尋章摘句所挾皆古人精髓每下筆語不驚人不止善飲工詩如澄海樓角山書齋首山宴集諸作皆見重於時先娶穆孺人繼娶溫孺人四子長君衡雍正乙卯拔貢次熟癸卯科拔貢己酉科舉人次儵廩貢生次焄邑庠生先生卒於雍正壬子年壽享七十有六和幼與先生遊繼又聯社於儀部余公門下是以先生生平嘉言懿行足以範宗族型鄉黨者得述其梗概如此

郭熟字仁田如柏子雍正癸卯拔貢己酉舉人少時父病癰勢甚危獨夜焚香籲天請減已算十年以延父壽父果不藥而愈比及卒適符十年之數兄衡入表兄光州牧趙子敬幕趙被誣累及兄傳聞甚劇欲往探之父以路遠不許同母亟請乃許之典已室衣飾得數十金隻身遠涉事白偕歸父卒未有葬地殯於城北桃花菴兩弟儵焄守柩已與兄秉家政事母每晚仍詣柩所哭奠同寢靈幃三年如一日至葬而後已母患風痰侍疾二年始終無倦容

母卒亦停厝已與四弟壯守靈如喪父禮服闋官蔚州學正勵士風息爭訟
廣學舍崇澤宮政教著聞上游咸引重焉兩攝州篆奉公守法寬嚴並濟屢
次課最丙戌卒於官年七十四 家乘

李明生字鏡湖例監生孝友純篤母死廬墓三年工右軍書法雍正十一年選

江南歙縣巡檢司未蒞任

舊志

李標生字立峯府學增生母死廬墓三年工右軍書法

舊志

王名標字弼侯邑諸生生平敦行尙義凡有益地方之事不惜財力爲之遠近
皆稱爲善人至其傳家教子均可取法

清計鵬翀王善人傳善人王弼侯者邑諸生也祖居西羅城敦孝友尙禮
讓疎財仗義樂善好施自雍正年間施藥救人其後世相承無替乾隆三
年捐住宅地東西兩丈餘闢爲南北通衢以便人行名遵義衢乾隆八
年邑侯張楷建彰善坊旌之乾隆四年捐修白橋并捨橋南西岸房基地
建水壩立石碣又築白橋南石橋一段名仗義橋於房後菜園南鑿井以

資里閤飲名遵義井乾隆五年捐修郭西石河內石橋東西兩段計石七十餘丈凡三年而成名遵義橋捨菜園數百畦與高姓種以充搭撤遵義橋之費當初設渝關書院時捐重資以襄事又竭力捐倉穀奏請恩獎以榮其親方伯沈元起旌其門曰善有餘慶乾隆九年獨力修西門口道扶杖鳩工寒暑不輟督學錢陳羣題其額曰孝弟忠信又旌曰仁風足式至傳家節儉訓子義方有百忍詩傳頌生於康熙卒於乾隆壽七十平生善事卓著婦孺咸知至今猶嘖嘖頌曰王善人

郭堡宗字拱宸邑廩生疾惡如仇然與人接則藹然可親遇童稚亦加以禮每邑試爲廩保力杜冒籍等弊管糧通判某欲抽分糧行已有成議堡宗出而阻之商感其義踵門謝曰若事有不虞至於興訟一應斧資衆人任之答曰余本爲地方公事非爲私也麾而去之事亦遂寢堡宗事親孝父歿率弟陞宗陞宗廬於墓三年

節程儒珍郭拱宸先生傳

穆德純字文甫增生八歲父環洲宦遊雲南歿稍長痛不知父骸所在及補弟

子員隻身往尋父櫬歷黔滇吳越荆楚諸省三載不遇遂精誠禱祝於天一日至西蜀忽遇父舊僕指其靈櫬所在於是直達滇省果得其柩負骸回里渡江會同船前倉被盜德純正酣睡夢父呼其名警之醒負骸避遂獲免後數遇巨風卒免於厄及至家已六載矣生平喜吟詠所著有雪山雲賦並序及茂洲閒吟詩集

周維新世居城西黃土坎生子二孫三曾孫六元孫七來孫八百年之久六世同居男婦四十餘人事皆家長主之婦人不與外事人各有正業婚喪賓祭皆有成章服用皆有分例人無私蓄食必同堂男女分左右室有不至者家長必詢其故其人心之厚家法之嚴久遠相沿無替

魏文通字畏齋其先甘肅靖遠人父官山永協把總生三月而父卒喪歸原籍文通育於其叔叔官大毛山把總因入臨榆籍補弟子員食廩餼聞祖父墓在原籍瀕河易受水患亟欲省親遂措資西行跋涉馳驅比抵原籍艱苦萬狀乃遷其祖父母暨父與叔母之柩以還是行也閒關萬里屢瀕險阨賴神